



# ՄԿՐՏԻՔ ԱՐՄԵՆ

## Հեղնար աղբյուր

Գլուխ առաջին

1

Քաղաքի բնակիչների նախահայրերը տասնյակ տարիներ առաջ եկել էին Փոքր Ասիայի քաղաքներից և իրենց հետ բերել էին յուրաքանչյուրն իր ծննդավայրի պատկերը, հայերը՝ Կարինի, հույները՝ Իզմիրի և թուրքերը՝ Պոլսի:

Յուրաքանչյուրն իր քաղամասը կառուցել էր այդ պատկերի համաձայն:

Փողոցներն ուղղաձիգ էին ու լայն, շենքերը միհարկանի էին՝ սևաքար պատերով, որ ունեին դռների ու լուսամուտների կարմրաքար զարդաշրջանակներ:

Յուրաքանչյուր սև քարի սահմանները երիզված էին սպիտակ քարակ գծերով և այդպիսով պատի սևությունն առնված էր զվարք սպիտակ ցանցի մեջ: Մանր փոշին, ժամանակի ընթացքում ներծծվելով ծակոտկեն քարերի մեջ, դրանց երբեմնի թարմ սևությունը դարձրել էր գունաքափ և նույնպես զվարք:

Դոները նեղ էին և քարձի, միափեղկ և կամարաձև: Կամարն իրենից ներկայացնում էր գոան վերևուս տեղավորված կիսաշրջանաձև լուսամուտ՝ միջանցքը լուսավորող: Դոներից շատերի առջև կար սալահատակված փոքրիկ քարձրություն՝ քարե երկու-երեք աստիճաններով:

Բնակարանների լուսամուտները նույնպես կամարաձև էին, ունեին գունավոր ներկված արտաքին փեղկեր, դրանց ետևում՝ երկաթավանդակներ:

Լուսամուտների շրջանակափեղկերը քացվում էին դեպի ներս:

Բնակարանի դոան կողքին բակի դարպասն էր՝ մեծ ու երկփեղկանի, փեղկերից մեկի վրա փոքրիկ դռնակով: Բայց ավելի հաճախ բնակարանի դուռը գտնվում էր ոչ թե դարպասի կողքին, այլ ներսում՝ բակում:

Տարբերությունները տների միջև աննշան էին: Եկվորները, յուրաքանչյուրն իր հետ քերած լինելով իր ծննդավայրի պատկերը, բոլորով միասին քերել էին համարյա նույն պատկերը: Եվ ահա, այնտեղ, որտեղ առաջ մի հնադարյան գյուղ էր ընկած, փովել էր եկվորների քաղաքը, որի միասնական անունն էր Գյումրի: Այնտեղ հայերը բռնում էին քաղաքի մեծ մասը, իսկ հույներն ու թուրքերը՝ մեկական թաղամաս:

Անցել էին երկար տարիներ, մեռել էին եկվորները, աճել ու մեծացել, ծերացել ու մեռել էին նաև նրանց հետ եկած զավակները, որոնց հիշողության մեջ ելից աշխարհը լոկ տարտամ, մանկական պատկեր էր: Իսկ թոռները, որ ծնվել էին այդ նոր քաղաքում, չունեին նույնիսկ այդ տարտամ պատկերը: Նրանք արդեն իսկական գյումրեցիներ էին: Նրանք ելից աշխարհի մասին լսել էին լոկ իբրև ինչ-որ հին պատմության՝ իրենց չվերաբերող, իրենցից այնքան հեռու, որքան որ հազար ու մեկ գիշերները: Իսկ նրանց զավակներն ու թոռներն արդեն այնքանն էլ չգիտեին, որ ապրում էին Կարինին, Իզմիրին և Պոլսին շատ նմանվող թաղամասերում:

Ցարական շինովնիկները, որ տիրում էին քաղաքը, երբեք չէին կարողացել թափանցել դրա կյանքի խորքը, չէին կարողացել իրենց գորշ երանգը սրսկել դրա մեջ: Իսկ այն, որ փողոցներում կանգնած էին ոստիկաններ և քաղաքի շրջակա զորանոցներում և բերդում կային զորքեր, դա միայն օղակ էր՝ կյանքի շուրջը հազցված: Դրա մեջ Գյումրին ուներ իր սեփական գույնը, որը և համառորեն պահպանում էր:

Քաղաքի հարավ-արևելքում կտրուկ վերջանում էին բոլոր փողոցները և սկսվում էր մի ճանապարհ, որը ձգվում էր երկու երկար, քարե պատերի միջև: Պատերն անընդհատ էին, և դրանց վրա, իրարից բավական հեռու, կային միայն դարպասներ, համարյա միշտ փակ: Դրանցից մի քանիսի կողքին, քառանկյունի խորության մեջ, կային աղբյուրներ: Պատերի անմիջապես ետևում, պատերին գուգահեռ, կանգնած էին բարձր բարդիների շարքեր, իսկ բարդիների ետևում

փոված էին բոստանները:

Այդ ճանապարհը ոլորապտույտ գնում էր դեպի դիմացի բարձրավանդակը, որի լանջի մոտ բոստաններն ու դրանց պատերը վերջանում էին: Այնուհետև ճանապարհն արձակ լանջով բարձրանում և գնում էր դեպի հեռու գերեզմանոցը, որը չէր երևում, լանջն իր բարձրությամբ ծածկում էր այն:

Այդ լանջի վրա, որտեղ այժմ ոչինչ չկար, մի ժամանակ փոված էր քաղաքի թուրքական թաղամասը: Համաշխարհային պատերազմի ժամանակ ցրիվ էին եկել դրա բնակիչները, իսկ հետագայում հետզհետև քանդվել էին շենքերը, և քաղաքը զրկվել էր մի ամբողջ թաղամասից: Այժմ այնտեղ, քարքարոտ հողի վրա, բնում էր կարճ, դեղնավուն խոտը և հետք անզամ չէր մնացել նախկին բնակավայրից: Եվ դատարկ լանջն այժմ թվում էր այնքան փոքր, որ անհնար էր պատկերացնել, թե առաջ այդտեղ փոված էր եղել մի ողջ թաղամաս՝ իր տներով, բակերով, փողոցներով . . .

Իր առանձին, փակ կյանքով ապրող թաղամաս էր դա: Ցերեկները դրա խաղաղ փողոցներում մարդիկ քիչ էին երևում: Երբեմն միայն հայտնվում էր շաղրայով փաթաթված մի կին, որ մոտենում էր որևէ դուռ և չխկչխկացնում էր երկարե թակը կամ մի ահազին բանալի էր պտտեցնում դրա ժանգոտ փականքի մեջ: Դուրը կիսաբաց անելով, կինը մտնում էր ներս և խւկոյն փակում:

Երբեմն տներից մեկից դուրս էր գալիս մի աղջիկ՝ նույնպես շաղրայով փաթաթված: Նրա ձեռքից կախված էր լինում պղնձե ջրաման զյուգյումը՝ երկար և կեռ խողովակով: Գյուգյուսի դուրսը դեղին էր լինում, ինչպես գունատ ոսկի, իսկ ներսը՝ գորշ, ինչպես գունատ արծաթ: Պատահում էին նաև զյուգյումներ մուգ բրոնզե, որոնց վրա արաբական տառերով խիտ փորագրված էին լինում խոսքեր՝ ջրի, սիրո և աշխարհի մասին:

Փոքր ու կլոր փափախները դեպի աչքերը թեքած, թաղամասի փողոցներով անցնում էին թուրքերը: Նրանք քայլում էին տների գույզ շարքերի միջով, ապա հանկարծ, մի թեփ վրա, ընդհատվում էր տների մի շարքը, մի քանի հարկերով իրարից ցած երևում էին թաղամասի մյուս փողոցների տափակ կտորները, ավելի ներքեւում՝ բոստանները, ապա հեռվում՝ քաղաքը, որն սկսվելով

բոստանների մոտից, տարածվում էր լայն ու հեռու: Բոստանների մեջտեղով անցնող ճանապարհը, թեքվելով, դուրս էր գալիս քաղաքի առաջին փողոցի վրա, որը թուրքական շուկան էր: Այնտեղ էին գտնվում նաև թուրքերի աշխանաները, չայխանաները և դայֆախանաները:

Ինչպես քաղաքի մյուս շուկաներում, այնպես և այնտեղ շարունակ խոնված էին լինում հայեր, հույներ, թուրքեր: Նրանք աշխատում էին, վաճառում, թեյ կամ սուրճ խմում, նարդի խաղում և խոսում Գյումրու երեք լեզուներից որով էլ ցանկանային, բայց մեծ մասամբ՝ հայերեն: Հատուկ աչք էր հարկավոր՝ հայերին, հույներին և թուրքերին իրարից զանազանելու համար: Իսկ զանազանելիս տարբերությունները լինում էին անկարևոր, աննշան: Նրանք բոլորը մի ժողովուրդ էին՝ գյումրեցի արհեստավորների ժողովուրդը: Ուստա Մկրտիչը թուրքերի մոտ «Մկրտիչ ախաղեր» էր, թուրք Ռահմանը հայերի մոտ՝ «Ռահման շան», իսկ հույն Աթանասը բոլորի մոտ՝ «տնկող Աքո»: Սակայն մի թուրք՝ Իբրահիմ անունով, իր դայֆախանան բացել էր ոչ թե շուկայում, այլ իրենց թաղամասում, որտեղ միայն բնակարաններն էին: Նա այդ դայֆախանան բացել էր, իհարկե, միայն թուրքերի համար և դա չէր թաքցնում ոչ հայերից, ոչ հույներից:

Ե , դուք խո գիտե՞ք, ախաղը բացատրում էր նա, օր մենք մեր Գյումրի քաղաքը մզկիթ չունինք: Վո՞վ իմանա, մեկ էլ տեսար, մոլեն ուզեցավ, օր կրոնքից խոսի, յա թե չէ՝ շարիաթին հակառակ գնացող մե մուսուլմանիմ դատը պիտի կտրենք: Լավ կէղնի՞, օր բազարի մեջ ձեզի ըսենք՝ ախաղը բացատրինք, դուս էկեք խայֆախանեցեն, առանձին գործ ունինք . . . Էղոր հմար էլ, մեր մայլի մեջ էլ տեսակ մի տեղը մեզի հարկավոր էր . . .

Եվ նայում էր Իբրահիմը հանցավորի նման: Բայց ոչ միայն նա, այլն նրա զրուցակից հայերն ու հույներն էին կախում գլուխները: Ամաշո՞ւմ էին նրանք, թե՞ լուծում էին փնտրում, թե այդ ինչի՞ց էր, որ չնայած իրենց այդքան մտերմությանը, այնուամենայնիվ հարկավոր էր առանձին հավաքատեղ ունենալ, անհրաժեշտ էր տարբեր թաղամասերում ապրել, և իրար հետ չէին կարող ամուսնանալ ոչ միայն մահմեդական թուրքն ու քրիստոնյա հայը, այլև հույնն ու հայը, որոնք երկուսն էլ քրիստոնյա էին: Ավելին՝ իրար հետ չէին կարող

ամուսնանալ երկու հայեր, եթե նրանցից մեկը լուսավորչական էր, իսկ մյուսը՝ կաթոլիկ . . . Ամաշում էին նրանք, թե լուծում էին փնտրում, թե այդ ինչի՞ց էր, որ թուրքը չէր ուսում հայի մորթած միսր, հայը՝ թուրքի պատրաստած պանիքը, մինչդեռ նույն թուրքն ու հայը խմում էին նույն սուրճը, ուսում էին նույն լավաշը . . . Միաժամանակ, նրանք խորշում էին միմյանց ամանից ջուր խմել, իրարից ջրաման չէին վերցնում և չէին տալիս, չպղծելու համար, իրենց համոզմունքով՝ իրենց շրթունքները, ամանի տիրոջ համոզմունքով՝ ամանինք . . . Այդ ամենը նրանց տարօրինակ էր թվում, բայց քանի որ նրանք վաղ մանկությունից էին սովորել դրանց, ուստի և, թուրքի պանիքը ուտելու լոկ միտքը տհաճություն էր պատճառում նրանց, իսկ թուրքի հաց չուտելու միտքը՝ զարմանք . . .

Թուրքական թաղամասը, լանջի երկարությամբ ձգվելով, բռատանների վերևուած իր մի ծայրով միանում էր հունական թաղամասին և հայկական քաղաքին: Միացման այդ կետում գտնվում էր քաղաքի ամենամեծ քաղանիքը, որտեղ նորից նույն անիմաստ խտրության շունչն էր:

Քաղանիքն արևելյան սովորական քաղանիք էր՝ սևաքար պատերով, հանդերձարանի և լողարանի վրա երկու մեծ գմբեթներով: Արտաքին դուռն ուղղակի բացվում էր հանդերձարանի վրա, որի կենտրոնում, քարձոր գմբեթի մանրիկ լուսամուտների մեջմ լուսի տակ, սևաքար կլոր ավազանն էր՝ քարձոր պատերով և կենտրոնում՝ ջուր հորդող կարմրաքար գուռով: Պատերի, տակ կային քարձոր ու լայն թախտեր, որ շրջանակել էին հանդերձարանը և ընդհատվում էին միայն դռների մոտ: Թախտերի առջևամասերից վեր էին քարձրանում փայտե սյուներ, սյուներից մինչև պատ կապված էին պարաներ, որոնց վրա միասին քաղանիք եկած կանանց խմբերը կամ ընտանիքները կախում էին սավաններ՝ այդպիսով թախտի մասերը դարձնելով առանձին օթյակներ: Դրա մեջ իհարկե վատ քան չկար: Վատը և անհեթերն այն էր, որ դա միայն հայերի և հույների հանդերձարանն էր: Թուրքերն ունեին իրենց հանդերձարանը, որի դուռը գտնվում էր լողարանի դռան դիմաց: Սենյակը նեղ էր ու երկար և ձգվում էր դռնից դեպի աջ և ձախ: Այնտեղ, քացի երկու երկար թախտերից, որոնք առանձին մասերի շբաժանված, մերկ և միապաղաղ ձգվում էին ծայրեծայր, որիշ ոչինչ չկար: Սենյակն իր լույսն ստանում էր ծայրի

պատերի լուսամուտներից, բայց հայերի և քուրքերի հանդերձարաններն իրարից բաժանող պատի վրա, դրան երկու կողմերում, համարյա անկյունների մոտ, կային երկու ցածր ու լայն բացվածքներ: Լույսի համար չեին դրանք անշուշտ, որովհետև քուրքերի հանդերձարանն ուներ սենյակի մերկությունն ավելի ընդգծող առատ լույս, իսկ հայերի հանդերձարանի գեղեցիկ կիսախավարին հարկավոր չէր ուրիշ լուսավորություն: Ինչի՞ համար էին դրանք՝ չէր կարելի ասել: Հայ երեխաներն իրենց հանդերձարանի թախտերի վրայից, և քուրք երեխաներն՝ իրենց, հանվելիս կամ հազնվելիս հաճախ նստում էին այդ բացվածքների գոգը և խաղ էին անում իրար հետ: Այդպիսի դեպքերում արագ մոտենում էր նրանցից մեկնումեկի մայրը և իր երեխային քաշում էր հեռու: Քիչ հետո, նոյն երեխան, թախտի վրա չոքած, արմունկները բացվածքի գոգին հենած, լուրջ ու մտազբաղ նայում էր այն կողմ, որտեղ մայրը հազցնում էր նրա հասակակցին: Նայում և իր մանկական ուղեղում գուցե արդեն հարց էր տալիս, թե արդյոք ինչո՞վ են իրենից տարբերվում նրանք, ովքեր գտնվում են այդ անհմաստ պատի մյուս կողմում . . .

Այս կողմում մի հայ կին երգում էր: Իսկ այն կողմում, քուրք երեխայի տատը, հանվելիս քրի տակ կամացուկ ձայնակցում էր նրան, և երբ ուժ էր անում՝ բոխչան քանդելու և թասն այնտեղից հանելու համար, նրա երգի անորոշ մրմունջից բարձրաձայն թռչում էին նոյն հայերեն բառերը: Թե այն կողմում և թե այս, նոյն փարիսացներն էին՝ «դեղին», «փախր» կամ «քութիա», նոյն փեշտըմալները, նոյն նալընները, նոյն շիրին-շայը, որ վաճառում էր մեծ հանդերձարանի մի օթյակում իր ինքնաեռն ու բաժակ-ափսեները ցուցադրած չայշի կինը, նոյն գաթան էր, հալվան, փախլավան, որ կանայք քերում էին իրենց հետ, տնից՝ նոյնանման բոխչաների մեջ կապած . . .

Լողարանում նույնպես թրբուիիներն ունեին առանձին սենյակ: Մեծ լողարանի մի թևի վրա գտնվում էին տախտակե երկու բարձր ու նեղ դռներ՝ խնամքով ծածկված: Դրանցից մեկի ետևում գոլորշու երկար ու նեղ սենյակն էր, իսկ մյուսը, նույնպես երկար ու նեղ՝ քուրքերի լողարանը:

Հանդերձարանից մտնելով մեծ լողարան, թրբուիիները գլխակախ գնում էին դեպի իրենց դուռը՝ շհասկանալով, թե ինչո՞ւ էր այդ այդպես: Իսկ հայուիիներն ու

հոյն կանայք, գուտերի մոտ կամ զյորակ-դաշո՛՝ կենտրոնի շրջանաձև տափակ մեծ քարի վրա նստած, նոյնպես տարակուսում էին և գլուխները կախում: Վերևից, բարձր գմբեթի քրտնած քարերից, մի սառը կաթիլ ընկնում էր որևէ կող վարդագույն, լիքը ուսի վրա և փլչում, բայց նա, մտքերով տարված, չէր էլ զգում այդ և չէր սրսփում:

Եվ այդպես ապրում էին կողք-կողքի հայերը, հոյները, թուրքերը՝ այնքա՞ն բանով իրար մոտ, բայց և այնքա՞ն բանով իրարից հեռու . . .

2

Բոստանների մեջտեղով անցնող ճանապարհով դեպի թուրքական թաղամաս էր գնում չաղրայով փաթաթված մի թրքուիի: Արևոտ, շոգ կեսօր էր, և կինն ըստ երևոյթին հոգնել էր: Չաղրայի նուրբ ծածկոցի տակ նրա գեղեցիկ մարմնածևերը փխրվում և նորից էին գոյանում խոնջացած շարժումներով և միաժամանակ՝ անհանգստությամբ: Բայց երբեմն թվում էր, թե ճանապարհն ու շոգը չեն նրան տանջողը, այլ մի ուրիշ, ներքին պատճառ: Անհավանական էր թվում, որ նրա գեղեցիկ և ամուր սրունքները հոգնած լինեին, թեկուզն նա եկած լիներ քաղաքի մյուս ծայրից: Նաև անհավանական էր թվում, որ նրա ջահել, առույգ կազմվածքը նվազեր այդ ավելի շուտ հաճելի, քան թե այրող արևից: Իսկ այն, որ նա խմել էր ուզում և շարունակ շուրջն էր նայում՝ աղբյուր գտնելու, նոյնպես ապացուցում էր նրա ոչ թե մարմնական, այլ հոգեկան տապը, որովհետև նա փնտրում էր չափազանց տենդահար, չափազանց հուսահատ:

Վերջապես նա տեսավ մի սովորական աղբյուր՝ պատի քառանկյունի խորության մեջ: Արագ մոտենալով և չաղրան երեսից ետ տանելով, նա ձգվեց դեպի խողովակը: Բայց հազիվ էին նրա շրթունքները հպվել փայլուն մետաղին, երբ շուրբ կտրվեց: Կինը ճշաց և սարսափած ետ քաշվեց:

Նոյն րոպեին աղբյուրի կողքին գտնվող դարպասի դռնակը բացվեց և մի հայ տղամարդ դուրս եկավ այնտեղից:

— Մի վախենա, բացի, ասաց նա թուրքերեն, — ախպուրը ես կտրեցի: Չուրը դարցուցի, օր բոստանս ջրեմ: Ներող էղի, բացի, ես չիտեի, թե խմող կար: Ահան կերթամ՝ կբանամ

Պետք չէ . . . ասաց թրքուիին և նոր միայն զգաց, որ իր երեսը բաց է: Նա արագ վրա քաշեց շադրան, շադրայի եզրերը բռնեց իր նուրբ ձեռքերով և շտապ հեռացավ:

Բոստանչին մնաց իր տեղում կանգնած՝ թրքուիու ետևից նայելով: Նրան կայծակնահար էր արել կնոշ սքանչելի գեղեցկությունը: Նոյն երեկո նա իր մոտ հրավիրեց աղբյուրների հոչակավոր վարպետ ուստա Մկրտչին և շափազանց առաս վարձատրելով նրան, խնդրեց ուրիշ ջուր բերել իր բոստանի համար, որպեսզի աղբյուրը դրսում հոսի անընդհատ և հավիտենական:

### 3

Թուրքական թաղամասի մի խաղաղ անկյունում, որտեղ երեք կողմից երեք խուլ պատեր շրջապատել էին մի փոքրիկ հրապարակ, իսկ չորրորդ կողմից փողոցն էր անցնում, սաղարթախիտ մի քանի ծառերի տակ կանգնած էր թաղամասի աղբյուրը: Դա սևաքար մի փոքրիկ շինություն էր՝ ութանկյուն և զմբեթածածկ: Ուր պատերից մեկի վրա աղբյուրի խողովակն էր իր պայծառ ջրով, իսկ խողովակի վերևում, մի կարմիր քարի վրա, հայկական, հունական և արաբական տառերով փորագրված էր ուստա Մկրտչի անունը: Մյուս յոթ պատերի վրա արաբական տառերով փորագրված էին յոթ իմաստություններ:

Թրքուիիներն աղբյուր էին գալիս թեթևաքայլ ու հանդարտ՝ կարծես երազի անմարմին էակներ: Չուր լցնելիս նրանք չեին խոսում իրար հետ, լուրջ էին և մտասնեո: Եվ աղբյուրը նույնպես, հոսում էր խաղաղ ու անձայն՝ զգուշանալով խախտել համատարած անդորրը:

Թրքուիին, որ ավելի հոգնած ու ծարավ էր երևում, քան քիչ առաջ, եթևաց փողոցի ծայրում: Տեսնելով աղբյուրը, նա եկավ դեպի այն: Երբ նա մոտեցավ, կանայք հարգանքով ետ քաշվեցին և մեկը նրան ջրաման առաջարկեց: Թրքուիին

Չրամանը շվերցրեց: Շրբունքները մոտեցրեց խողովակին՝ խմելու, բայց հանկարծ ճշաց ու ետ քաշվեց:

Ի՞նչ էղավ, վախեցան բոլորը, ի՞նչ էղավ, խանում . . .

Թրքուիին կանգնել էր սփրբնած ու դողահար: Նա անթարթ նայում էր աղբյուրին, որից ջուրը շարունակում էր հոսել վճիռ ու պայծառ:

Ի՞նչ էղավ, խանում, կրկնեց հարցն առանց ջրամանի կանգնած մի տարիքուտ թրքուիի, և նրա աչքերում կար ոչ այնքան հետաքրքրություն, որքան պահանջ:

Ճեզ, վենձ բաջի . . . Ես մտածմունքի մեջ էի . . . Էղոր հմար էլ, երբ աշքս ընկավ ախապուրի վրա ուստի անվանը, ընձի էնպես թվաց, թե էնտից ընձի տղամարդ աշեց . . .

Եվ մեծ ճիգով փորձեց ժպտալ:

Կպատահի, ասաց տարիքուտ կինը: Կրնա էղնի՝ հիվա՞նդ ես:

Այս անդամ թրքուիին ժպտաց անբռնազբոսիկ և թախծոտ:

— Սրտի հիվրնդութուն ունիմ, վենձ բաջի . . .

Ըշտը վախենալդ էղորեն է, բացատրեց տարիքուտ կինը: Հմը դու շատ մի մտածե: Ում սիրտն օր բարակ է, էնիկ շատ չպիտի մտածե՝ կըսե շարիաթը:

Գիտեմ . . . հառաչեց թրքուիին, շնորհակալություն հայտնեց և զնաց:

Բոլորը նայեցին նրա ետևից:

Վո՞վ է, հարցրեց մեկը:

Ես մեր բոլոր կնկտոց գիտեմ, հմը էղոր չեմ ճանչե, ասաց երկրորդը:

Էղիկ իրեք օր առաջ էկավ, հաղորդեց տարիքուտ կինը: Ես բաղնեցեն կուգայի, հանդրպավ Իբրահիմի ղայֆախանեցեն քիշը իսդին ու հարցուց, թե կրնա՞ մեր

թաղի մեջ քրեհով մե տունը բռնե: Ես ձեռաց մտքես անցուցի Հարիբեհ  
տունը . . .

Հարիբեհ տո՞ւնը, սարսափած բացականչեցին կանայք:

Հա, մեղքս ի՞նչ ծածկեմ: Գնացի մոլլիս քովը: «Մոլլա, ըսի, Էս քա՞նի տարի Է, որ  
Հարիբեհ դուռը փակ է, ու մենք կսպասենք Էնոր ետ գալուն»: «Տասսը տարի»:  
«Ախր, մոլլա, Մեքքա էրթալ-զալը մե տարիմ Էլ շպիտի քաշեր: Ըսել Է՝ Էնիկ  
մեռել Է: Լավ բան չէ, օր Էնոր գուռն էսքան տարի փակ է մնացե: Մեր կմկտիք  
հնարել են, թե Հարիբեն գողտուց ետ է դարցե ու տարեցեմ ավել է, օր գողտուց  
կապրի իրան տունը: Իբրև թե, զիշերներն Էնոր դուան ետևեն ձեն կուզա: Բանալ  
է հարկավոր ու մարդ բնակլոցնել» . . .

Հարիբեհ տո՞ւնը, բացականչեցին կանայք:

Լսեք վերջը: «Քրեիր կբաժանենք աղքըտներուն, ըսի, կամ թե չէ կհավաքենք ու  
Էղով մեկիմ Մեքքա կորկենք: Համ կերթա ուխտ կէնե, համ Էլ, վո՞վ զիտե, գուցե  
Հարիբեին գտնի ու հետը ետ բերե» . . . Մոլլես համաձայնվավ . . .

— Համաձայնվա՞մ մոլլեն . . .

Հա: Եղ կնիկը հիմի Էնտեղ կապրի:

Գյուգյումն ընկավ մի կնոջ ձեռքից, և ջուրը թափվեց, Բոլորը քարացան: Մեկը  
միայն, հազիվ շշնչաց .

Ալլահի դեմ գործ Է . . . Թե օր խեղճ կնիկն իմանա իրան տան պատմութունը,  
լեղին պիտի պատոի: Ինքն Էլ Էնքան վախուկ . . .

Իմացավ: Խնդաց:

— Խնդա՞ց . . . չհավատալով, կրկնեցին բոլորը:

Հա: Հանաք էրավ: Ըսավ՝ ճիշտ է, Հարիբեն ետ է եկե, Հարիբեն ես եմ, Ալլահն իմ  
ուխտս կատարել է . . .

Բոլորը հանգստացած շունչ քաշեցին:

Իգիթ կնիկ, քացականչեց մեկը:

Քա՞նի տարեկան կէղնի, հարցրեց մյուսը:

Եռարնչորս-եռարնիինգ, ենթադրություն արեց տարիքու կինը:

Անունն ի՞նչ է:

Էլի Հաքիբա:

4

Հաքիբայի շենքը թուրքական թաղամասում ոչնչով նման չէր Գյումրու այլ շինություններին: Այն ոչ թե սև քարից էր, այլ կարմիր աղյուսից և ուներ բոլորովին այլ կառուցվածք: Դրա անպատճիկան և խոլ պատի վրա մշտապես փակ էր փոքրիկ, ամուր դարպասը: Այնպես էր թվում, թե այն երբեւ չէր կարող բացվել: Թվում էր, որ եթե բացվեր էլ, դրա ետևում ոչ թե մուտք էր լինելու, այլ նույնպիսի խոլ պատ:

Այն փողոցը, որի վրա գտնվում էր Հաքիբայի տունը, շատ կարճ էր և շարունակ անմարդ, որովհետև ուրիշ ոչ մի բնակարանի դուռ չէր բացվում այնտեղ: Փողոցն իր երկու ծայրերով դուրս էր զալիս երկու այլ փողոցների ոչ բանուկ մասերի վրա:

Երբեմն, պատահաբար այդ փողոցով անցնելիս, փոքրիկ երեխաները զվարձության համար չխկչխկացնում էին Հաքիբայի դարպասի փակը: Հարվածների հնչյունները տարածվում էին թնդուն ու խոլ, ինչպես մամուապատ ջրի մեջ նետված ծանր քարերի ձայներ: Երեխաները վախենում էին դրանից և երկրորդ անգամ այլևս թակը ձեռք չէին վերցնում:

Ինչպես երեխաները, այնպես և մեծերը, առաջվա նման դեռ այժմ էլ շարունակում էին խուսափել այդ տանը մոտենալուց: Այն, որ հիմա այնտեղ

ապրում էր ջահել Հաքիբան՝ ոչինչ չէր փոխել: Նա նոյնքան փակ ու խորհրդավոր կյանք էր վարում, որքան և անցյալում նրա նախորդը: Ոչ ոք չգիտեր, թե ե՞րբ էր նա տանը լինում, ի՞նչ էր անում, ե՞րբ էր բացակայում, ո՞ւր էր գնում . . .

Ճիշտ է, այդ ամենն այլս չէին վախեցնում մարդկանց և իհարկե վախը չէր նրանց հեռու մնալու պատճառը: Այժմ բնակիչները հեռու էին մնում պարզապես այն պատճառով, որ միևնույնն էր, այնտեղ բնակվող թրուիին անհուսորեն անմատչելի էր նրանց համար: Թե կանայք, թե մանավանդ տղամարդիկ, այրվում էին հետաքրքրությունից, բայց միշոցներ չգտնելով որևէ բան տեղեկանալու, դադարել էին փորձելուց: Այն քիչ բանը, որ գիտեին նրանք, վերաբերում էր բնակարանին: Դուրս էր եկել, որ պառավ Հաքիբան հարուստ կին էր եղել և թողել էր ընտիր կահ-կարասի, զարդեր, հազուստեղեն . . . Ո՞վ էր եղել նա և ե՞րբ էր եկել Գյումրի՝ ոչ ոք չէր կարող ասել: Վաղուց մնացած մի ավանդություն էր շրջում մարդկանց մեջ, թե իբր Հաքիբան եղել էր մի հարուստ հնդիկի այրի և ո՞վ գիտե ինչ հեռուներից և ինչի համար էր թողել-եկել այդ քաղաքում իր վերջին տարիներն անցկացնելու: Մոլան նոր բնակչութուն պատմել էր այդ ավանդությունը, որը նրան շատ էր դուր եկել: Նա գնել էր Հաքիբայի տան ամբողջ սարքուկարգը և արդուզարդը, որով պարզվել էր, որ նա ևս, իբր նախորդի նման, հարուստ էր:

Այդքանը միայն:

Եվ նորից խուլ էր պատը, և նորից փակ էր դարպասը:

Բայց ահա, արագ քայլերով այդ փողոցը մտավ մի երիտասարդ: Թեև նա թուրք տղամարդկանց նման փափախ էր դրել և ոչ թե շափիսա, բայց ուշադիր նայելիս կարելի էր նկատել, որ հայ էր: Նա մտավ փողոց, կանգ առավ մի րոպե, ձևացրած անտարբերությամբ նայեց դեսուդեն, և ապահովվելով, որ ոչ ոք իրեն չի նկատել և չի հետևում, շտապ մոտեցավ Հաքիբայի դարպասին և չորս անգամ թակեց: Սպասեց մի պահ, ապա նորից թակեց չորս անգամ: Դարպասը կիսաբաց եղավ, երիտասարդը մտավ ներս, դարպասը փակվեց:

Երիտասարդն իրեն զգաց լիակատար մքության մեջ: Դարպասը, որով նա ներս էր մտել, արդեն խոլ փակված էր, և դրա շատ նեղ մի քանի ճեղքերից սպրդել էին միայն արևային բարակ երիզներ, ինչպես նուրբ ոսկեթելեր՝ մքության մեջ կախված, առանց լուսավորելու որևէ բան:

Ի՞նչը գտար տունը, ազիզ ջան, վախեցած շշուկով հարցրեց թրքուհին: Նա հայերեն էր խոսում, և խոսում էր նոյնքան լավ, որքան և բուրքերեն:

Քու անուշ հոտովդ գտա, անուշ ջան, քու ամուր քաշելովդ գտա, քաշող ջան . . .

Չէ, դուն ըսա, թե ի՞նչը գտար տունը . . .

Աշքերս խփի՝ սերդ ընձի բերեց, անկրծներս խփի՝ ձենդ ընձի բերեց . . .

Չէ, չէ, դուն ըսա, թե ի՞նչը գրտար տունը:

— Ի՞նչը չգտնեի: Քու քաղցր լիզվի նկարագրութունով գտա: Դուն օր ըսիր, թե մեր գաղտնիքի պես փակ տունըն է՝ էղիկ ընձի հերիք էր:

Նոյն րոպեին դարպասի թակն ուժեղ շխչխկաց մի քանի անգամ: Թրքուհին վախեցած ճիշ արձակեց և կպավ տղային: Տղան ամուր գրկեց նրան և նրանք շնչները պահեցին: Բայց թակողը երեխաներ էին, որոնք թակի հնչյուններից վախեցած, շտապեցին հեռանալ ձայն տալով միմյանց:

Զուր տեղը վախեցար, ազիզ . . .

Շատ կվախենամ, ազիզ . . . Քիչմ առաջ, ճամբու վրա, ծարվըցա: Մոտեցա ախապուրին՝ ջուր խմելու, ախապուրը ցամքավ: Մեր բռնած գործն ասսու սրտովը չէ . . .

Մի մտածե, անուշ ջան, դարտակ բան է:

Թրքուհին ձայն չհանեց:

— Երթանք նես, ասաց երիտասարդը զվարք ձայնով, տեսնինք մեր սիրու տունը . . .

Թրքուիհին նորից ձայն շհանեց:

Երթանք . . . կրկնեց երիտասարդը:

Չերթանք, անուշ ջան . . .

Եվ թրքուիհին աղերսական բռնեց երիտասարդի ձեռքը:

— Չերթանք, ազիզ, կրկնեց նա, ես կվախենամ . . . Գեշ բան կէղնի . . .

Ի՞նչ գեշ բան էղնի, բացականչեց տղան, ես սաղ եմ քեզի հմար: Վո՞վ կրնա բան էնե: Երթանք . . .

Ես առաջ մեննակ մարդոցից կվախենայի, հմը հիմի ասսուց Էլ կվախենամ: Վո՞վ է տեսե, որ մարդ ունեցող կնիկը սիրական պաե . . .

Պատասխանելու փոխարեն երիտասարդը նրան վերցրեց իր թևերի վրա, սեղմեց կրծքին և մթության մեջ խարխափելով, փորձեց գտնել դուռը: Երկու անգամ նրա ձեռքը կպավ դարբասին: Ոչ, այդ չէր պետք: Իսկ կողքի պատերը որոնց վրա նա փնտրեց սենյակի մուտքը՝ խոնավ էին ու խուլ:

Ո՞ւրտեղ է դուռը . . .

Կինը սարսափից կարկամած, փորձեց ազատվել նրա գրկից:

Ո՞ւրտեղ է դուռը, ազիզ . . .

Չիտեմ, մի հարցընե . . .

Վերջապես դիմացի պատի վրա տղայի ձեռքը շոշափեց երկարե մի ունկ: Տղան քաշեց այն և զարմացավ անսպասելիությունից. այնտեղ, որտեղ նա սենյակ էր ենթադրում, տեսավ տան պարտեզը:

Փոքրիկ, քառակուսի քակ էր այն: **Պատերի** տակ կային սպիտակասալ մայթեր: **Մեշտեղում**, մայթերի պոռունգներից սկսած, բուսել էին ցածրահաաակ և սաղարթախիտ ծառեր: **Դրանց ճյուղերն** այնպես խիտ էին գրկել իրար, որ ամբողջ քակի վկա գոյացել էր կանաչ, խիտ ծածկ: **Տար տարվա** թափված տերևներն իրենց գույնը կորցրած և հողի երանգ ստացած, հաստ ու փափուկ գորգով ծածկել էին ողջ գետինը: **Դրանք թափթփվել էին նաև սպիտակ մայթերի** վրա, որոնց վերևում ևս, ծառերն իրենց սաղարթներն էին տարածել: **Բայց** սաղարթներն այդտեղ խիտ չէին, և արևի պայծառ ու խոշոր պատառներն ընկել էին մայթերի վրա՝ ավելի շեշտելով կենտրոնի կանաչավուն կիսախավարը:

**Պարտեզի** կենտրոնում կար սև քարե մի քառակուսի ավազան՝ գետնին հավասար պոռունգներով: **Դրա** կենտրոնից, կարմրաքար գուտից, բուղիս հորդում էր ջուրը և թափվում ավազան: **Երևում** էր, որ ջուրը փակ էր եղել, և թրքուիին նոր էր քացել այն, որովհետև ջուրն ավազանում թարմ էր և շմամուակալած: **Ավազանի** ջուրջը նկատվում էին ծաղիկների մարգերի հետքեր, որոնք նույնպես ծածկված էին մեռած տերևներով:

**Բնակարանը** բոնում էր դիմացի ողջ պատը, որ զվարթ-նարնչագույն աղյուսից էր: **Պտտի** կենտրոնում, քառանկյունի խորության մեջ, դուռն էր, դեպի որը բարձրանում էին քարե մի քանի աստիճաններ: **Մուտքի** մի կողմում պատն ուներ սպիտակ շրջանակներով երեք սովորական լուսամուտներ, իսկ մյուս կողմում համարյա ողջ պատը բոնել էր մի քառակուսի մեծ լուսամուտ՝ բազմածև գույնզգույն ապակիներով:

**Բակի** մյուս պատերն ևս նարնչագույն աղյուսից էին: **Կողքերի** պատերի տակ օժանդակ սենյակներն էին՝ նեղ դոներով: **Փողոցի** վրայի պատը՝ դարպասի երկու կողմերում, ուներ սրածայր կամարներով երեքական որմնախորշեր՝ սպիտակ սվաղած: **Այդ** որմնախորշերում դրված էին տարբերածև վեց խոշոր սափորներ, որոնց բրոնզն ամբողջովին փորագրված էր արաբական քառերով:

**Սաղ Գյումրին** էլ օր ոտի կայնի, անուշ, էլի չպիտի կրնընա գտնի մեր ոիրու տունը, քացականչեց տղան: **Հեշ** մի վախենա:

Թրքուիին փաթաթվեց նրա պարանոցով: Տղան իր գրկից բաց շրողնելով նրան, քայլեց դեպի բնակարանի դուռը:

6

Հատակն ամբողջ ծածկված էր գորգերով: Երեք պատերը, մինչև իրենց բարձրության կեսը, նույնպես ծածկված էին գորգերով: Իսկ գորգերից մինչն առաստաղ՝ նուրբ մանրանկարներ էին, որոնք տեղ-տեղ ընդհատվում էին սրածայր կամարաձև որմնախորշերով: Պարտեզի որմնախորշերի նման, այդտեղ ևս, շարված էին սափորներ, բայց ավելի փոքր, և ոչ միայն բրոնզից, այլև գունազարդ կավից, ճենապակուց, արծաթից:

Առջևի պատն ամբողջովին՝ բազմագույն ապակիներով լուսամուտն էր: Այնտեղ կային հազար ու մի շափի օղակներ, աստղեր, արևեր, ծաղիկներ՝ բաղկացած մանր ու մեծ ապակիների խայտաբղետ ներդաշնակությունից: Այնքան բազմագույն էր այդ լուսամուտն իր բազմաձև ապակիներով, որ թվում էր հիանալի մանրանկար, որտեղ վառվող գույները կարծես պայծառ ներկեր լինեին և ոչ թե դրսից թափանցող արևի լույսը:

Առաստաղի շորս անկյուններում կային ուռուցիկ քանդակներ՝ բաղկաղած եռանկյունիներից, որոնք ծածկված էին հայելու կտորներով: Հայելու նույնալիսի կտորներով էր ծածկված նաև առաստաղի կենտրոնը, որտեղից կախված էր բրոնզե մի մեծ շահ:

Թե՛ լուսամուտի, թե՛ գորգերի, թե՛ պատերի մանրանկարներն այդ բեկրեկուն հայելիների մեջ անդրադառնում էին գույների ու ձևերի ամենաանհնար կոտրատումներով:

Մենյակի խորքում, գորգերից մեկի վրա թեք ընկած և թևն ասեղնազործ մետաքսե մի բարձի հենած, այդ հայելիներին էր նայում երիտասարդը: Նրա մոտ, ամոթից շառագունած և ավելի գեղեցկացած, գլխահակ նստել էր թրքուիին: Վերևից անշարժ կախվել էր շահը, որի վրա մոմերը չեին վառվել ահա տասը տարի: Հատակին, կնոջ խոնարհած հայացքի ներքո, փովել էին գորգի

անհմանալի նկարները:

Հանկարծ երիտասարդը նայեց դեպի լուսամուտը և քազմաքղետ լույսն արտացոլվեց նրա աչքերում: Առանց նայելու կնոջը, նա ձեռքը դրեց նրա ձեռքի վրա և շշնջաց .

Ես կիսուրկեմ այգին տասար տարվա մեռած տերևներեն, ազիզ, թող ուրախ էղնի մեր սիրու տունը: Ես կնորոգեմ մարգերն ու նորից ծաղիկներ կցանեմ էնտեղ, ազիզ, թող զվարք էղնի մեր սիրու տունը: Ես կնոսորցնեմ ծառերու ճուղբերն արևի հմար, ազիզ, թող պայծառ էղնի մեր սիրու տունը . . .

Հարկավոր չէ, ազիզ, չկամեցողը երդիք կելնի, էնտից կնկատե քեզի: Թող էսպես մնա . . .

Ես ծառ ու ծաղկի ուստա կկանչեմ, զարդարել կուտամ այգին, ազիզ: Թող մեր սերը լավ անցնի ու լավի մեջ անցնի . . .

Հարկավոր չէ, ազիզ: Առանց էն էլ դուն շատ ես մխսե: Ընչի՞ հմար: Ես տասար տարով քեզնեն վենձ եմ: Դուն շաել տղա ես, դուն ընձի շուտ պիտի մտեհան էնես . . . Էսքանն էլ օր էրիր ընձի հմար՝ էքսանն էլ հերիք է . . .

Երիտասարդը ձեռքով փակեց նրա շրթունքները, որ նա այլս շշարունակի, ապա գրկեց նրան և նայեց նրա մաքուր-սպիտակ ճակատին:

Դուն տասար երկնքով ընձնեն բանձր ես, անուշ: Տասար տերև քացած ծաղիկ ես դուն: Տասար գարուն տեսած աղունիկ ես դուն . . .

Թվաց, թե երիտասարդը մեծ տղամարդ էր, իսկ փարթամ ու լիքը կինը փոքրիկ աղջիկ: Մնալով մի քիչ այդպես գրկախառնված, կինը հանկարծ տագնապով դուրս եկավ տղայի թևերի միջից, ձեռքը դրեց սրտին և մրմնջաց .

Գեշ բան պիտի էղնի, ազիզ, սիրտս անհանգիստ է: Մեր սերը երկան տևել չի կրնա: Կնիկ արարածն էսքան երջանիկ էղնելու իրավունք չունի . . .

Մի խոսի, մի ըսե . . .

Դուն պզտիկ ես, դուն չիտես, գեշ բան պիտի էղնի, հոգի . . .

Տղան մոայլվեց: Նա իր մազերի գանգուրը ետ տարավ ճակատից, նայեց շահերի հանգած մոմերին և շշնջաց .

Ընչի՞ մեր սերը հալածված շեյրանի պես էս տունը մտներ: Ընչի՞ ամընչեինք մարդոցից ու աշխարքից: Ընչի՞, ախր ընչի՞ . . .

Կնոջ աշքերը թրջվեցին արցունքից: Տղան շարունակեց .

Աշխարքը կթքե մարդուց բաժնըվող կնկա երեսին: Աշխարքը կթքե էղ կնկան առնող մարդու երեսին: Մենք իրավունք չունինք իրար հասնելու, մեր սերը գողութուն է . . .

Ընչի՞, ախր ընչի՞ . . .

7

Քաղաքի հեռուներից հասան եկեղեցիների գանգերի ձայները: Կինը ցնցվեց .

Գնա, հոգի, գնա: Ճիմի քոլոր տղամարդիկ բազարից տուն կուգան: Էնոնք չպիտի նկատեն չե թե էս տնեն քու դուս գալդ, չպիտի տեսնին էս նայլից էրթալդ: Դուն ձախ կողմի դարտակ փողոցով իջի բոստընները: Էղ կողմեն քեզի մարդ չի տեսնի . . .

Կէրթամ, հոգի, կէրթամ . . .

Չե, հիմի գնա, ազիզ, ախր ես էլ պիտի էրթամ, ուշ է:

Տղան վեր կացավ, դրեց փափախը:

Մեկ էլ ե՞ք կուգաս, անուշ, դիմեց նա կնոշը:

Էլի կիրակի օրը:

Օր ես մեռնի՞մ մինչի կիրակի, անզութ: Գոնյա ուրբաթ օր:

Ուրբա՞թ, ներողամիտ Ժպտաց կինը . թուրքի կիրակի՞ն: Բոլոր տղամարդիկ եղ օրը մայլեն կէղնին, բոլոր ապրողները տներեն դուս, փողոցները կէղնին . . .

Գոնե շաբաթ օրը . . .

— Չէ, ազիզ, հառաչեց կինը: Օր շուտ-շուտ գամ՝ մեր տնեցիք կնկատեն: Օր շուտ-շուտ հանդրապինք՝ աշխարքը մեզի շուտ կբաժնե իրարուց . . . Ես մեննակ կիրակի օրերը տնեն դուս գալու պատճառ ունիմ . . .

Տղան գլխիկոր դուրս ելավ թրբուհու հետ: Երկու դարպասների մութ միջլանցքում նա համբուրեց կնոջը և ետ քաշեց փողոցի դարպասի փակը: Թրբուհին գլուխը հանեց դուրս, նայեց աշ ու ձախ:

Մարդ չկա, ազիզ, գնա . . .

Երիտասարդի գնալուց հետո սպասելով մոտ քառորդ Ժամ, կինը նույնպես դուրս ելավ, մեծ քանալիով կողպեց դարպասը և նույնպես ձախ կողմի անմարդ փողոցով իջավ դեպի բուտանների միջով անցնող ճանապարհը:

Նրան ևս ոչ ոք չնկատեց:

8

Քաղաքի փողոցներում վերջալուս էր:

Դոների մոտ դրված քարերի վրա նստել էին հասակավոր գյումրուիհները և գուլպա էին գործում: Մատների մեքենայական շարժումներով ճաղերն աշխատեցնելով, նրանք նայում էին անցորդներին կամ պարզապես դեպի փողոցի մի ծայրը:

Այն փողոցները, որոնք ձգված էին հյուսիսից-հարավ, արդեն գտնվում էին աղջամուղի մեջ: Միայն դրանց անկյուններում մայթերը լուսավորվել էին ոսկե

Եռանկյունիներով, ցույց տալով, որ հատող փողոցները դեռ ողողված էի արևի վերջին լույսով:

Որքա՞ն պայծառ էր երևում արևի վերջին այդ լույսը գրոհող ստվերների մեջ: Արևմուտքից-արևելք ձգված փողոցներում որքա՞ն համառ էին կառշել ճիզից կարմրած ճառագայթներն ապակիներին, պատերի կարմիր քարերին և բարդիների գագաթներին . . .

Արևի մեջ նստած գյումրուիհները թվում էին վերջալուսային էակներ, և թվում էր, թե շողերի մարվել-հանգչելու հետ միասին պիտի լուծվեին ու չքանային նաև նրանք՝ դոների մոտի քարերը թողնելով դատարկ . . .

Կանանց ձեռների ջերմությունից տաքացած, ճաղերը շարժվում էին արագ, գուլպաների կարճ փողերը երկարում էին քիչ առ քիչ: Բայց երբ փողոցով փշում-անցն ում էր մարմնի համար չզգացվող մի հով՝ ճաղերը սառչում էին կանանց ձեռքերի մեջ և կարծես կարծրանում:

Կանանց կողքերին նստել էին երեխաները՝ խելոք, մտասույզ, վերջալուսի պահից տագնապած:

Գյումրուիհները, ուշադրություններն արդեն դեպի գործվող գուլպան, մինչև մուրն ընկնելը վերջացնելու համար, շրթունքների մեքենայական շարժումներով պատմում էին երեխաներին հին պատմություններ, նրանց ավանդում էին հոչակավոր գյումրեցիների կյանքն ու վարքը:

Պատմում էին նրանք մի գյումրեցու մասին, որն իր տունը կառուցելիս հիմքի չորս անկյուններում դրել էր ուրագ, օղի, մատանի և խաչ: Եվ պատմում էին մի այլ գյումրեցու մասին, որը քառասուն տարի ապրել էր մի մեռած աղջկա սիրով և այդպես էլ մեռել: Եվ պատմում էին մի գյումրեցու մասին, որն ամբողջ կյանքում շրջել էր իր պատանն ուսին զցած, մտախոհ ու համրաքայլ: Եվ պատմում էին մի գյումրեցու մասին, որը վաղուց ի վեր պատրաստել էր տվել իր գերեզմանաքարը՝ վրան փորագրել տալով ամեն հարկ եղածը՝ բացի մահվան թվականից: Եվ պատմում էին մի գյումրեցու մասին, որը եղել էր քաղաքի ամենաբարձր եկեղեցու՝ Կաթողիկեի վրա խաչն ամրացնողը, որի համար ստացել էր Արդար

մականունը: Եվ պատմում էին մի գյումրեցու մասին, որը բազմաթիվ անգամներ մերձիմահ հիվանդացած, հազնվել էր մի կերպ, դուրս էր եկել տնից և օրորվելով գնացել օղետուն, խմել էր խեղդվելու շափ, վերադարձել էր տուն՝ կրկնակի օրորվելով, և հաջորդ օրն արթնացել էր նորից առողջ: Եվ պատմում էին մի գյումրեցու մասին, որի եղբայրն աքսորված էր և որը հինգ տարի շարունակ, ամեն երեկո, սեղան էր պատրաստում, վառում էր տաճ բոլոր լամպերը, գնում էր կայարան՝ նրան դիմավորելու, և վերադառնում էր մենակ: Եվ պատմում էին մի գյումրեցու մասին, որը եղել էր նշանավոր որմնադիր և ստեղծել էր համատարած հոչակ: Թագավորը Գյումրի այցելելիս հիացել էր նրա պատերի յուրահատուկ շարվածքով և ցանկացել էր տեսնել նրան: Բայց երբ գնացել էին նրա ետևից, նա եղել էր սարսափելի հարբած և քնած: Թագավորը վերադարձել էր, բախտն անցել էր վարպետի մոտով՝ առանց նրան քսվելու . . .

Պատմության մի կետում կանայք նկատում էին շուկայից տուն վերադարձող իրենց ամուսիններին կամ զավակներին և վեր էին կենում: Երբ տղամարդիկ մոտենում էին և բարի երեկո մաղթում, կանայք հեզ պատասխանում էին բարևին և նրանց ետևից մտնելով ներս՝ դուռը փակում: